

Inatsisartut 2009-mi ukiakkut ataatsimiinerat aallarnerfigalugu Namminersorlutik Oqartussat ingerlatseqatigiiffiutaasa aammalu ingerlatseqatigiiffiit piginneqataaffigisaasa aningaasatigut ingerlanneqarneri taamatuttaaq ingerlatseqatigiiffiit ataasiakkaat ineriartortinneqarneri pillugit aammalu pissusiusut tunngavigalugit Naalakkersuisut iliuuseriniakkatik ilanngullugit Inatsisartunut ukiumoortumik nassuiaasalernissaat pillugu Inatsisartut aalajangiiffigisassaattut siunnersuut.

(ATASSUT-ip Inatsisartuni ilaasortaaitai: Finn Karlsen, Siverth K. Heilmann, Knud Kristiansen)

Akissuteqaat

(Naalakkersuisut siulittaasuat)

Siullermeerneqarnera

Aallaqqaasiullugu Inatsisartunut ilaasortat aalajangiiffigisassamik siunnersuuteqartut qutsavigaakka.

Naalakkersuisut isumaqatigaat ingerlatseqatigiiffiit tamakkiisumik ilaannakuusumilluunniit Namminersortunit pigineqartut pillugit paasissutissanik annertuumik pisariaqartitsisoqarmat. Taamaammat nittartakkami Nanumi quppernermik pilersitsisoqarpoq tassani ingerlatseqatigiiffiit tamarmik pingaarnertut paasissutissartaat pissarsiarineqarsinnaalerlutik. Taamatuttaaq Naalakkersuisut siulersuisut siulittaasuinut tamanut allakkaminni erseqqissarpaat ingerlatseqatigiiffiup paasissutissaataanik tamanut saqqummiunneqarsinnaasunik tamanut saqqummiussisarneq pitsaanerulertariaqarmat, ingerlatseqatigiiffiit nittartagaasigut taamatuttaaq Naalakkersuisunut ukiup affakkaartumik ukiulluunniit sisamararterutikkaartumik nalunaarutunik nassiussisoqartarneratigut. Tamakku saniatigut ingerlatseqatigiiffiit naatsorsuutaat pissutsillu allat Erhvervs- og Selskabsstyrelsimit tamanut saqqummiunneqartarput.

Ukiuni kingullerni ukiumoortumik nalunaarutini paasissutissat annertusiartorsimapput, maannakkullu ukiumoortumik nalunaarutit paasissutissanik sukumiilluinnartunik imaqartalerput peqatigitillugu kukkunersuisartuusunit naliliivigineqarsimasartunik.

Inatsisartut Aningaasaqarnermut Ataatsimiititaliaata aktiaateqarlutik ingerlatseqatigiiffiit tamakkiisumik ilaannakuusumilluunniit Namminersortunit pigineqartut ukiumoortumik nalunaarutaat qarasaasiakkut pappiaqqatigullu juunip qaammataani ataatsimeersuarnerit naammassineqarniartut tigusalerpai.

Tassa imaappoq Aningaasaqarnermut Ataatsimiititaliap ingerlatseqatigiiffiit pillugit paasissutissat nutaajulluinnartut tigusalerpai. Ukiumoortumik nalunaarutit nassuiaatinit sukumiinnerusarput nutarpasinnerusarlutillu, taamaammat ataatsimiititaliap paasissutissat immikkut pisariaqartitani ajornannginnerusumik pissarsiarisinnaalerpai.

Naalakkersuisut ingerlatseqatigiiffinnik piginnittuunerminnik piviusorsioortumik silatuumillu tunngaveqarlutik ingerlatsinissaat qulakkeerniarlugu aalajangersagaqarpoq Inatsisartut Naalakkersuisunik nakkutilliinissaannut qulakkeernittunik. Tassami Aningaasanut Inatsimmi aalajangersagaqarpoq inatsisartut akuersissuteqarsimassasut pigisanik nalilinnik Kalaallit Nunaanni Namminersorlutik Oqartussanit pigineqartunik tunisat 5 mio. Koruunit sinnerlugit akeqalersimassappata. Tamakku saniatigut Inatsisartut Naalakkersuisullu pillugit inatsisip allanngortinneqarnera pillugu Inatsisartut inatsisaat nr. 18, 20. november 2006-imeersumi aalajangersagaqarpoq, taanna malillugu Kukkuersiunermit Aningaasanullu ataatsimiititaliat piginnaatitaallutik Naalakkersuisut peqqusinnaallugit ingerlatseqatigiiffiit tamakkiisumik ilaannakuusumilluunniit Namminersortunit pigineqartut pillugit paasissutissanik immikkut ittunik pissarsiniarnissaannut.

Naalakkersuisut piareersimapput juunip qaammataata naalernerani ataatsimeersuarnerit naammassineqarneranni aktiaateqarluni ingerlatseqatigiiffiit tamakkiisumik ilaannakuusumilluunniit Namminersortunit pigineqartut pillugit ukiumoortumik killiffinnik paasissutissiisarnissaminnut, tassa Inatsisartut taamaaliornissaq iluaqutaasussatut isigissappassuk. Ilisimatitsissutigineqassarli ukiumoortumik nassuiaataasartut ingerlatseqatigiiffiit ataasiakkaat pillugit iloriusissatut eqqarsaatersuutininik taamaallaat killilimmik imaqartarsinnaammata. Paarlattuanilli Naalakkersuisut pisortat peqataanerat pillugu namminneq eqqarsaatersuutiminnik taamatuttaaq ingerlatseqatigiiffinnik pineqartunik piginnittuunerup inuiaqatigiinnut tunngatillugu iluaqutaassusia pillugu eqqarsaatersuutiminnik nassuiaateqartarsinnaassapput.